

23.3.89 GR

# Bruno Soliva-Jacomet, Sedrun



Sd. Mesjamna, ils 1 da mars 1989, ha nies convischin Bruno Soliva surdau sia olma al Scaffider e gest derschader. El ei spartius el spital da Glion suenter liunga malsogna, ch'el ha purtau cun pazienza e resignaziun, ella vegliadetgna da 74 onns e 4 meins. Sia glisch ei stizzada, ina glisch ch'ardeva dapi onns ed onns cun ina flomma empau brausla, ch'era bein enqualga sin stizzar, mo che derasava tuttina adina fidonza e contentientscha. Per il car defunct ei la senda tras questa veta terrestre stada ils dus davos decennis ualtsinusa e dolorusa. Oz sa el retscheiver dil Segner la pagaglia per sia pazienza, che vegin segir buca snegada ad el.

## Giuventetgna e camps da lavur

Per ils consorts Toni Soliva e Cresenzia, nata Bearth, mutta il datum dils 10 da november 1914 in di da gronda legria, cura ch'els san tschentar en tgina in saun e vescal pop, al qual els dattan il num Bruno. Dus onns pli tard regala il Segner als dus ventireivels conjugals ina poppa, la Tina. La ventira cuoza buca ditg. Nunspetgadamein vegin la mumma Cresenzia clamada tiel Segner els onns ch'ils affonets havessen duvrau ella pli che zacu. Augs ed ondas por-schan maun e segidan cun la famiglia dapertut nua ch'ei fa basegns. Aschia passenta il Bruno cul bab, cun ses parents e cun la cumionza dil vitg Sedrun sia giuventetgna en in bien ambient da cultura rurala. Il talentus scolar frequenta las scolas primaras e secundaras

dalla vischnaunca. El havess segir giu fetg bunas premissas per studiar e se-scolar vinavon, mo ei tucca da star a casa e segidar.

Per gudignar in pèr raps ed emprender tudestg serenda il giuven mat per in tempset a Lucerna. Da quella dimora ella bassa profitescha Bruno in tschuat. El rimna bunas enconuschentschas da lavur e dil lungatg german, ch'el dominescha stupent, quei buca il davos entra stedia lectura. – Returnaus en tiara romontscha, dotaus cun empau experienzia, cun duns practics ed inschignus sco el fuva, anfla el, malgrad ils onns maghers, adina puspei lavur ed occupaziun.

Duront pliras sesiuns s'engascha el sco gidonter ella casa d'albiert dalla famiglia Florentin Cavegn sill'Alpsu. En buna memoria resta il Bruno sco capavel signun en differentas alps ed ella cascharia dil vischinadi da Sedrun. Tut era adina bein preparau, ordinau e ca-vegliau – senza dubi ina qualitad artada da ses antenats. Da gliez temps existeva a Sedrun ina pintga fabrica, ina scarse-naria e filantaria. Cheu anfla el per in pèr onns lavur e fadigia.

Onns da trer flad empau pli levamein representan pér suenter la secunda uiara mundiala. Da 1947 entochen 1956 survegn Bruno ina interessanta occupaziun tier siu quinau Giusep Jacomet – e quei sco construider da pe-gnas da scalegl. Duront la sesiun d'unvier dat ei empau lavur tier la societat dalla Sutgera Sedrun-Cungieri.

Igl onn 1957 vegin el engaschaus dalla firma Murer SA sco cauluvrer el menaschi da far gera e sablun giul Drun. Quel diregia el cun gronda capientscha e premura entochen igl onn 1970. Plascher, interess e bunas qualitads sco menader, precisas directivas e bien uorden ein facturs che distinguan il cau-menaschi. Deplorablamein sto el seretrer da quella piazza muort ina malsogna che mudregia el continua-damein.

## La famiglia

Igl'onn 1948 entra Bruno en stan da lètg cun la giuvna Catrina Jacomet, da Mompé-Medel. El decuors dils onns vegin la lètg benedida cun 11 affons. Las neblas sestgirentan sur la veta fami-

liara, cura ch'ins annunzia la mort nunspetgada dil fegl Bruno, che ha banduau ils ses ella vegliadetgna da mo 24 onns. Ils geniturs mettan gronda peisa sin ina buna formaziun ed educaziun. Lur bien quita e la carezia pils affons fuorman ina cumionza cun fermi li-gioms. Els dattan in bien exempel e han in egl aviert sespruond da dar ad els in maletg empalont. La buna tgira dalla consorta Catrina e las oreifras relaziuns culs affons e beadis levgeschan empauet il pitir e dattan curascha e forza al malsau.

## En survetsch dalla cumionza

Da giuven ensi s'engascha il Bruno en uffecis communals ed en uniuns culturales. Buca meins che 24 onns funcziunescha el sco causecziun. Igl onn 1961 vegin el elegius sco gerau. Duront 6 onns eis el in bein renconuschiu commember dalla suprastanza communal. Ses votums ein adina concis e bein ponderai, magari era cungi cun empau humor e satira. Ulteriura lavur carga ins aunc si ad el cun surdar igl actuariat dalla cumission tutelara, sco cassier dil CHB duront 10 onns, sco vicepresident dil consum VOLG e plinavon sco com-member dalla suprastanza dalla cassa Raiffeisen etc. Igl ei quei ina brava curtauna emplenida cun lavur e quitaus.

Medemamein ei il temps liber emple-nius pulitamein. Sco capavel musicant (bassist) eis el status duront 24 onns in fi-deivel e premurau commember dalla societat da musica. Sper la musica tra-lai el era buca il cant. Da 1938 entochen 1953 fa el part dil chor-baselgia e dente-ren aunc dil chor mischedau. Ina flei-vlezia dalla vusch sforza el da desister dal cant. Quellas zacontas regurdien-tschas dattan buca in maletg cumplein dalla activitat dil car defunct.

Ils 4 da mars havein nus priu cumiau dad in bien vischin, che ha adempiu ses survetschs fideivlamein, seigi quei vi-savi sia cara famiglia ni alla communitad. Las societads da cant e musica han rendiu a lur fideivel commember la davo-sa honur ed il duiu engraziament. Agl ur dalla fossa giavischein nus a Ti, preziau amitg, il ruous etern ed alla famiglia en malencurada exprimin nus nossa sincera condolentscha. Ruaussa en pasch!